

UKIUMUT MISSINGERSUUSIORFIUSUMUT 2008-MUT KOMMUNINUTATAATSIMOORTUMIK TAPIISSUTIT PILLUGIT ISUMAQATIGIISSUT

Illua'tungeriit isumaqatigiissutigaa Naalakkersuisut Inatsisartut 2008-imut aningaasanut inatsisissaannut siunnersuummi 761.509.000 kr.-it kommuninut ataatsimoortumik tapiissutigineqassasut siunnersuutigissagaat. Taamaalilluni ataatsimoortumik tapiissutit 2007-imi tapiissutaasuniit 22,4 mio. kr.-inik ikinnerussapput. Ilanngussaq 1-imi takuneqarsinnaavoq isumaqatigiissummi qanoq ataatsimoortumik tapiissutit 2007-imut sanilliullugit allannguuteqarneri. Isumaqatigiissutip immikkuualuttortai ataani allaaserineqarput.

1. Akinut akissarsianullu iluarsiiissutit

Isumaqatigiissutigineqarpoq 2007-imi ataatsimoortumik tapiissutit 783,9 mio. kr.-it akinut akissarsianullu 2,86 %-imik iluarsiiissuserneqassasut, 2008-mi 22.419.000 mio. kr.-inik naleqartumik.

2. Ataatsimut isigalugit sipaarutissat

Naalakkersuisut 2004-mut aningaasanut inatsisissatut siunnersuut aallarnerfigalugu aningaasartuutissanik tullerriiarineq allanngortiteriffigilerpaat, ilinniartitaanermut inuussutissarsiornermullu aningaasaliissutit annertunerulernissaat siunertaralugu. Naalakkersuisut 2005-imi Aningaasaqarneq pillugu nalunaarummi siunnersuutigaat 2006-imi aningaasanut inatsisissatut siunnersuummi sulii annertunerusumik tullerriiarinikkut allanngortiterisoqassasoq ilinniartitaanermi aningaasaliinerunissaq 400 mio. kr.-it angullugit 2012-2013-imiit annertussuseqarsinnaaqqullugu.

Aningaasaqarneq pillugu 2005-imi nalunaarummi naliliinermi tikkuarneqarpoq inuit 2.800-nik amerlanerusut ukiut tamaasa ilinniagaqarlutik ilinniarnermulluunniit assingusumik ingerlataqalersimasassasut suliniutit tamakkiisumik ingerlalerpata. Tassunga sanilliunneqassapput illoqarfanni suliffissaaleqisut agguaqatigiissinneqarnerat 1.900 missaaniimmat, nunaqarfinnilu suliffissaaleqisutut nalunaarneqarsimasut qaammammut 400 missaaniillutik.

2005-imi aningaasanut inatsimmi Inatsisartut kommuninut ukiumoortumik tapiissutinut sipaarutissat inissitsitersimavaat, 2006-imi 25,9-inik, 2007-imi 51,7 mio. kr.-inik aammalu 2008-miit 77,1 mio. kr.-inik nalillit. Naalakkersuisut 2005-imi aningaasanut inatsimmi sipaaruteqarnissamut siunnersuummi tunngavigaat ilinniartitaanerup annertusiartornissaanut sillimatinik peqarnissaq.

Isumaqatigiissutigineqarpoq aningaasartuutissat tullerriiarneqarnerisa allanngortinneqarne-rat, ilinniartitaanerup inuussutissarsiornerullu ineriartortinneqarnerata aningaasaliiffigineqarneru-nissaanik siunertaqartoq, nammatassaasoq kommunit Namminersornerullutillu Oqartussat ataatsimoorlutik isumagisariaqagaat.

NAMMINERSORNERULLUTIK OQARTUSSAT
KALAALLIT NUNAANNI KOMMUNEQARFIIT KATTUFFIAT

2006-imi illua'tungeriit kommunit aningaasaqarnerat aallaavigalugu isumaqatigiipput sipaarutissat kommuninut atortussanngortinneqarnissaata aningaasannngortinnissaa ilinniartitaanerup aningaasalersorneqarnissaanik tunngaveqartoq ukiup affaanik kinguartinniarlugu, taamalu kommunini sipaarutissat 2007-mi 38,8 mio. kr.-inut, 2008-mi 64,7 mio. kr.-inut aammalu 2009-mi 77,7 mio. kr.-inik annertussusilerlugit piviusunngortinneqassasut. 2006-milu 12,3 mio. kr.-init ingerlaavartumik siparniutinut inissinneqareersimmata, tamanna isumaqarpoq, kommuninut aningaasaliissutit 2007-mi 26,5 mio. kr.-inik ilanngarneqaqqissasut.

Qulaani allassimasut tunuliaqutaralugit susassaqtut isumaqatigiissutigaat kommuninut ataatsimoortumik tapiissutit 2008-mi 25,9 mio. kr.-inik ikileqqinneqassasut. Kommuninut ataatsimoortumik tapiissutit 2009-mi 38,9 mio. kr.-inik ikilineqassapput.

3. Utoqqalinersiat

Utoqqalinersiat pillugit Inatsisartut peqqussutaata nr. 3, 7. maj 2007-imeersup nutaap kinguneraa kisermaanut tunngaviusumik tunniuttakkat maannamut 88.812 kr.-iusimasut 1. juli 2007-imiit 110.000 kr.-inngornerat. Aappariinnut tamarmik utoqqalinersialinnut tunngaviusumik tunniuttakkat maannamut 133.212 kr.-iusimasut 150.000 kr.-it amerlanerpaaffigilerpaat. Aappariinnut aappaa utoqqalinersiaqarpat aappaalu siusinaartumik soraarnerussutisiaqarpat utoqqalinersiat tunngaviusumik tunniuttakkat maannamut 133.212 kr.-iusimasut amerlanerpaamik 140.000 kr.-iulerput.

Tamatuma saniatigut utoqqalinersiallip saniatigut isertitaasa iluarsineqartartut amerlassusissatut killigitinneqartoq qaffanneqarpoq. Aammattaaq utoqqalinersialik nammineq inuttut isertitaqanngitsoq maanna kisermaatut utoqqalinersiani tunngaviusumik tunniuttakkat annerpaaffissaa affaanik pisinnaatitaalerpoq. Siusinnerusukku 20 %-iinnaasimagaluarput.

Utoqqalinersiat pillugit Inatsisartut peqqussutaat nutaap kommunit utoqqalinersianut aningaasartuuteqarnerulernerannik, tamatumunngali aamma peqatigitillugu kommunini akileraarutinit isertitaqarnerulerujussuarnissamik nassataqassaaq. Tamanna tunuliaqutaralugu kommuninut ataatsimoortumik tapiissutit 2008-mi 26.740.000 kr.-inik, 2009-mi 26.370.000 kr.-inik, 2010-mi 22.750.000 kr.-inik, kiisalu 2011-mi 23.520.000 kr.-inik ikilisinneqarnissaat illua'tungeriit isumaqatigiissutigaat.

2007-imut tapiliussatut isumaqatigiissuteqartoqarpoq utoqqalinersiat pillugit inatsisartut peqqussutaata nutaap 1. juli 2007-imit atuutilerpera pissutigalugu 2007-imi ataatsimoortumik tapiissutit 13.690.000 kr.-inik ikilineqarnerannik kinguneqartumik.

4. Najukkani pinaveersaartitsinermut siunnersortinut Paarisamit tapiissutit.

Najukkani pinaveersaartitsinermut siunnersorteqarnek nalunngisarput 1997-imi siullermik misiligitut kiisalu 1998-imit suliniutitut pinaveersaartitsinermi siunnersorteqarnertut aallartinneqarpoq.

Pinaveersaartitsinermit siunnersortit 2006-imi aallartinneqartumik 2007-illu naanerani naammassineqartussamik ilinnialeruttorput. Ilinniartitaanerup naanerani pineqartumut aningaasaliissutit Paarisamit kommuninut nuunneqarnissaat isumaqatigiissutaavoq. Tamanna tunuliaqutaralugu kommunit 2008-mit 1,8 mio. kr.-inik taarsiiffigineqarnissaat isumaqatigiissutigineqarpoq. Aningaasaliissutit nuunneqartut najukkani pinaveersaartitsinermit siunnersortinut akissarsiaqartitsinermit aningaasartuutitut tunngapput.

5. aamma 6. Aningaasartuutit inatsisitigut pisussaaffigisanik iluarsineq nalileeqqinnerlu

5.1 Siusinaartumik soraarnerussutisianik 2006-imut iluarsineq

Siusinaartumik soraarnerussutisianut aningaasartuutit 2006-imi naatsorsuutigisaniit ikinnerusimapput. Tamanna tunuliaqutaralugu illua'tungeriit isumaqatigiissutigaat kommuninut ataatsimoortumik tapiissutit 2008-mi 10.303.000 mio. kr.-inik ikilisinneqassasut.

5.2 Siusinaartumik soraarnerussutisianik 2009-mit iluarsineq

50/50-imik aqqissuussinerup piviusunngortikkiartorneqarnera peqatigitillugu kommunini siusinaartumik soraarnerussutisianut aningaasartuutit qaffannissaannik naatsorsuuteqarneq tunuliaqutaralugu ukiuni missingersuusiorfiusuni tamani 2009-2011-mi pineqartumut eqqoriaanerugallartumik 6 mio. kr.-inik immikkoortitsisoqarpoq.

6.1 Ineqarnermut tapiissutinik 2006-imut iluarsineq

Ineqarnermut tapiissutinut aningaasartuutit 2006-imi naatsorsuutigineqartuniit qaffasinnerusimapput. Illua'tungeriit isumaqatigiissutigaat kommuninut ataatsimoortumik tapiissutit 3.748.000 kr.-inik 2008-mit qaffanneqassasut, kommunit ineqarnermut tapiissutinut aningaasartuutaasa qaffakkiartor-nerannut matussutitut.

6.2 Ineqarnermut tapiissutinik 2007-imit iluarsineq

Ineqarnermut tapiissutinut aningaasartuutit 2006-imi naatsorsuutigineqartuniit qaffasinnerusimapput. Ukiuni kingullerni atukkat tunuliaqutaralugit Aningaasaqarnermut Pisortaqarfiup aamma 2007-imi pineqartumut atuinerussuteqarujussuarnissaq naatsorsuutigisariaqarsora.

Taamaattumik illua'tungeriit isumaqatigiipput kommuninut ataatsimoortumik tapiissutit 2008-mi 4.000.000 kr.-inik amerliniarlugit 2007-imi suliassaqarfimmi tassani kommunit aningaasartuutaannut amerlissutaassangatinneqartut matussutissannik. Ukiunut missingersuusiorfiusunut 2009-2011-mut ukiut tamaasa suliassaqarfimmut tamatumunnga 2 mio. kr.-inik missiliuutaagallartutut ilasuteqartoqartassaaq.

7. Atuarfitsialak

Atuarfitsialammik aqqissuussineq aqqutigalugu 11. klassit ukiup atuarfiusup 2007/2008-p naanerani atorunnaarsinneqassapput. Kommunit piffissami ikaarsaarfimmi 31.07.2008-p tungaanut nalu-

naaqqat akunnerinut atuartitsiffiusunut aningaasartuuteqarnerussapput ataatsimoortumik tapiissutitsigut matussuserneqartunik. 2009-mi Atuarfitalak tamakkiisumik atuutilersimassaaq, taamalu ataatsimoortumik tapiissutit matussusiisarneq taamaatissaaq.

Aaqqissusseqqinneq ukiuni atuarfiusuni ataasiakkaani assigiinngitsunik sunniuteqarpoq 2005-imullu isumaqatigiinniarnernut aallaaviusimavoq 2008-mut ataatsimoortumik tapiissutit 2,6 mio. kr.-inik 2009-miillu katillugit 5,0 mio. kr.-inik appartinneqarnissaat.

Tamanna tunuliaqutaralugu illua'tungeriit isumaqatigiissutigat ataatsimoortumik tapiissutit 2008-mi 2,6 mio. kr.-inik 2009-miillu katillugit 5,0 mio. kr.-inik appartinneqassasut.

8. Meeqqanut inuusuttuaqqanullu ulloq unnuarlu najugaqarfiit -2008-mut missingersuutit
Ilaqtariinnermut Pisortaqaqfiup KANUKOKA-llu akornanni isumasioqatigiittoqareneratigut ulloq unnuarlu meeqqanut inuusuttuaqqanullu angerlarsimaffinni 2008-mi aningaasartuutissat pillugit isumaqatigiittoqarpoq.

Ulloq unnuarlu meeqqat inuusuttuaqqallu angerlarsimaffiit kommunit 2008-mi aningaasartuutissat katillugit 114.680.000 kr.-inut missingersuusiorneqarput. 2006-imi atuinikinnerussutaasut 2,0 mio. kr.-it ilanngunneqassapput, taamalu kommuninut ataatsimoortumik tapiissutit 50%-imik aningaasaliissutit sinnerinit ilanngarneqassapput, katillugit 57.340.000 kr.-inik annertussuseqartunik, kommuninut ataatsimoortumik tapiissutinut ilanngaaticineqartussanik.

Illua'tungeriit tamanna tunuliaqutaralugu isumaqatigiissutigat ataatsimoortumik 2008-mi tapiissutit 57.340.000 kr.-inik ikilisinneqassasut.

9. Pisortanit ikiorsiissutit pillugit peqqussut – qanigisaasut ilisaaneranni angerlartarneq
Pisortanit ikiorsiissutit pillugit inatsisartut peqqussutaannut nutaamut nr. 15-imut, 20. november 2006-imeersumut atatillugu nutaartaavoq inuit qanigisamik illoqarfimmi allami ilisaaneranni orni-gunnissamut akissaqanngitsut angallanneqarnerannut kommunit aningaasartuuteqartassasut. Tamanna tunuliaqutaralugu illua'tungeriit isumaqatigiissutigat ataatsimoortumik tapiissutit 2008-mit 300.000 kr.-inik amerlineqassasut.

10. Assigiimmik akeqartitsinerup nutarterneqarnerata kingunerisaanik iluarsiiissutit.

”Ukiuumut aningaasanut pilersarusiorfiusumut 2005-imut ataatsimoortumik tapiissutissat pillugit tapiliussatut isumaqatigiissut”-mi 28. oktober 2004-meersumi illua'tungeriinnit isumaqatigiissutigi-neqarpoq ataatsimoortumik tapiissutit iluarsiiivigineqartassasut aningaasartuutikinnerussutaasut pillugit naatsorsuineq 2005-imiit 2009-mut attuuttoq tunngavigalugu

Naatsorsuinerit naapertorlugit kommunit aningaasartuutikinnerussutaat naatsorsorneqartut 2007-imi 1.860.254 kr.-init 2008-mi 726.461 kr.-inut allanngussapput. Nikingassut tassaavoq kommunit ani-

ngaasartuuteqarnerulernissaattut naatsorsugaq 2007-imit 2008-mut. Nikingassut 1.134.000 kr.-inik annertussuseqarpoq, illua'tungeriillu isumaqatigiissutigaaat kommuninut ataatsimoortumik tapiissutit 2008-mi taamatut qaffaqqinneqassasut. Kommuninut ataatsimoortumik tapiissutit 2009-miit 1.143.000 kr.-inik ilaneqassapput.

11. Ingerlatseqatigiiffiit akileraarutaata appartinneqarnissaa

Inatsisartut 1. januar 2007 aallarnerfigalugu ingerlatseqatigiiffiit akileraarutaat 35-imiit 30%-imut appartippaat. Illua'tungeriit isumaqatigiissutigaaat ataatsimoortumik tapiissutit 14,5 mio. kr.-inik 2008-imiit qaffanneqassasut, kommunit isertitakinnerunerannut matussutaasussanik.

12. Annertusisamik immikkut atuartitsineq

Aningaasartuutit utertinneqartussat pillugit Kulturimut, Ilinniartitaanermut, Iisimatusarnermut Ila-gee-qarnermullu Pisorta-qarfik aamma Kalaallit Nunaanni Kommuneqarfiit Kattuffiat isumaqatigiis-sutigineqarput. Akissarsiat aningaasartuutaasut utertinneqartussat 2007-imi 2008-imilu akissarsia-nut missingersukkat tunngavigalugit iluarsiiiffigineqarput. Akissarsiat 2007-imi atorneqartut 2,30%-imik 2006-imi akissarsiat aallaavigalugit iluarsiiiffigineqarput, aamma 2008-mi akit atorneqartussat 2,86%-imik iluarsiiiffigineqarput, 2007-imut missingersuutit aallaavigalugit. Illua'tungeriit isumaqa-tigiissutigaaat immikkut atuartitsinermut aningaasarsianut utertinneqartussaq 2008-imi 504,18 kr.-inik minutsini 60-ini atuartitsinermut annertussusilerneqassasoq.

13. Akiliisitsiniartarnerup qitiusumit ingerlanneqalernissaa

Ulloq 1. januar 2008 atuutilersumik akiliisitsiniartarnerup qitiusumit ingerlanneqalernissaa Inatsi-sartut aalajangiiffigisimavaat. Aningaasatigut kingunerisassai paasineqarniariarpata pineqartoq pil-lugu 2008-mut ilassutitut isumaqatigiissusiortoqartussaassaaq.

14. Meeqqanik inuusuttunillu ulloq unnuarlu paaqqinnittarfiit kommuninut tunniunneqar-nissaat

KANUKOKA-p kissaateqarnera naapertorlugu illua'tungeriit isumaqatigiissutigaaat meeqqanik inuusuttunillu paaqqinnittarfiit januaarip aallaqqaataani 2009-mi kommuninut tunniunneqarnissaa-ta piareersarneqarnera aallartissasoq. Paaqqinnittarfiit ingerlanneqarnerat kommuninit aningaasa-lersugaareerpoq, kommuninilu suliassaqarfimmi tamatumani pisinnaasat nukittorsarneqangaatsias-sapput paaqqinnittarfinni maanna sulisuusut aamma meeqqanik inuusuttunillu sullissisut allat aku-leriissinneqarpata. Suleqatigiissitaliortoqassaaq KANUKOKA-p, kommunit, Ilaqutariinnermut Pisorta-qarfiup Aningaasaqarnermullu Pisorta-qarfiup peqataaffigisaannik, aalajangernissamut tunngavissanik 2008-mi aasartinnagu suliaqartussanik.

NAMMINERSORNERULLUTIK OQARTUSSAT
KALAALLIT NUNAANNI KOMMUNEQARFIIT KATTUFFIAT

15. Taasariaqartut allat

Ataatsimoortumik tapiissutitut Namminersornerullutik Oqartussat kommunillu isumaqatigiissutaat una aningaasanik akuersisartut akuersinissaat apeqqutaatillugu isumaqatigiissutigineqarpoq.

Nuuk, ulloq 16. juni 2007.

Hans Enoksen
Aningaasaqarnermut
Naalakkersuisoq

Søren Alaufesen
Kalaallit Nunaanni Kommuneqarfiit
Kattuffiannut siulittaasoq

NAMMINERSORNERULLUTIK OQARTUSSAT
KALAALLIT NUNAANNI KOMMUNEQARFIIT KATTUFFIAT

Ilanngussaq 1.

Ukiumut missingersuusiorfiusumut 2008-mut kommuninut ataatsimoortumik tapiissutit immikkualuttortaat.

	Isumaqa tigiissut			
	2008	2009	2010	2011
2007-imi isumaqatigiissut tunngavigalugu aallaavik	783.901.000	783,9	783,9	783,9
1. Akinut akissarsianullu iluarsiiisutit	22.419.000	22,4	22,4	22,4
2. Nalinginnaasumik sipaarutaasut	-25.900.000	-38,9	-38,9	-38,9
3. Utoqqalinersiat	-26.740.000	-26,4	-22,7	-23,5
4. Najukkani pinaveersaartitsinermit siunnersortinut Paarisamit tapiissutit	1.800.000	1,8	1,8	1,8
5.1 Siusinaartumik soraarnerussutisianik 2006-imut iluarsiiineq	-10.303.000	0,0	0,0	0,0
5.2 Siusinaartumik soraarnerussutisianik 2009-mit iluarsiiineq	0	6,0	12,0	18,0
6.1 Ineqarnermut tapiissutinik 2006-imut iluarsiiineq	3.748.000	0,0	0,0	0,0
6.2 Ineqarnermut tapiissutinik 2007-imit iluarsiiineq	4.000.000	6,0	8,0	10,0
7. Atuarfitsialak	-2.600.000	-5,0	-5,0	-5,0
8. Meeqqat inuusuttuaqqallu ulloq unnuarlu najugaqarfii	-4.750.000	-5,8	-5,8	-5,8
9. Pisortanit ikiorsiiisutit pillugit peqqussut – qanigisaasut ilisaaneranni angerlartarneq	300.000	0,3	0,3	0,3
10. Assigiimmik akeqartitsinerup nutarterneqarnerata kingunerisaanik iluarsiiisutit.	1.134.000	2,3	2,3	2,3
11. Ingerlatseqatigiiffiit akileraarutaata appartinneqarnissaa	14.500.000	14,5	14,5	14,5
Kommuninut ataatsimoortumik tapiissutit nutaat	761.509.000	761,2	772,8	780,0